

# QVÆSTIO MEDICA

## QVODLIBETARIIS DISPVATIONIBVS MANE DISCVTIENDA

IN SCHOLIS MEDICORVM DIE IOVIS 14. FEBRVARII.

M. MICHAËLE POINSSART Doctore Medico Præsîde.

*An ab uno sanguinis calore vita munia?*

**S**PIRITVS, cui non una est subiecta notio, plerisque Medicorum corpusculum est obtutum fugiens, miræ subtilitatis ac pernicitatis, è purgatissimo sanguine exquisitè elaboratum, & ad absolutissimum nitorem perductum, cœlestis, ut quibusdam placet, originis & naturæ, animæ nodus ac vinculum, ad omnes utriusque functiones obeundas, viresque ac potestates ultrò citroque traducendas perneccissarium. Triplicis id generis, è cerebro, corde, & jecore, velut è triplici, ut aiunt, facultatis fonte jugiter haustum, per nervos, arterias, & venas admodum multas, quasi per rivos sibi à naturâ destinatos ocyùs oculi nictu in extremum corpus excurret, quoquo versumque diffusum, præter illas quas explet gestiones, ab oru infusum & cuiusque partis proprium spiritum continù fovet, reficit, ac instaurat. Ita illi egregiè consultum putant animæ, dum ei perinde ac Satrapæ tot tamque varios ministros, apparitores, nuncios & satellites assignant, ignari quàm se isto commento impediant, & in quos se induant laqueos.

**Q**VI negant corpus & animam dispares naturas, puram scilicet cum impurâ, immortalem cum mortali posse coire societatem absque mediæ cuiusdam naturæ interjectu, reddunt fabulam Academicorum exulem animum, quò corpus tenebricosum carcerem incolat, non uno illustri corpore priùs amicientium. At te, nisi jam versus es ad scholam mentemque meliorem, quæso formæ & materiæ, animæ & corpori sic à naturâ comparatis, ut & mutuo semper amore, & incredibili conjunctionis studio flagrent, quid opus est parârio spiritu quo concilientur? Nihilò melius de sapientia merentur, qui animæ rei tam divinæ, toti corpori singulisque ejus partibus totam se exhibentis, præsentissimæ, per seque nunquam non ad agendum expeditæ, facultates (quasi huc illuc oberrent & discurrant) quocunque deportari prædicant vectore spiritu. Sed nec geminâ istâ provinciâ à rerum prudentibus spoliato id negotij datum, ut præsto ubique sit animæ quodlibet officij munus exequenti. Intimum nec ab illâ, aut à corpore aliud, disjunctumque esse oportet, cui partes istæ delegentur.

**N**ATVRA, vel si clariùs potestas Dei ordinaria, ut rerum procreatione locuples ac copiosa, ita principiorum paucitate parcissima, nunquam in viventibus oriatur, quandiu bene habita membra minimè deficit salutaris ille calor, quo vita renetur ac definitur. Hujus unius principis instrumenti animæ morem gerentis operâ, partes omnes pulchrè absolunt descripta sibi munera. Is è cœlo primùm ductus, nec tamen specie ab elementi calore diversus, perpetuò in viventibus agitur & micat, summasque habet ad vitam opportunitates. Equidem nimius torret, vastat, conficit, malèque perdit omnia: at certâ moderatione temperatus, rebus formas inducit, animam glebis infundit, ex ovis pullos excludit & animat, stirpes alias hyemis inclementiâ propè enectas sustinet ac recreat, artus frigore rigidos restituit. Hoc ferrum concoquit passer marinus, calculos gallina, cicutam sturnus, helleborum coturnix, sic denique inter dissidentes qualitates reliquas eminet omnium facilè princeps, ut quæ opinionem superant ejus effecta, formæ naturæque proprietati attribuant plerique homines admiratione quadam stupidi. Idem tamen quantumvis actuosus, quia fugacissimus, promptè vanesceret, si nullum haberet sibi subiectum corpus cui inhaereret. Fuit igitur ipsi querendus tanquam in foco fomes stabilisque sedes, unde manaret assidue.

**N**VLLA res, nulla ratio cogitortum spiritibus precarium scenerari, in vitæque scenam advocare tot à sanguine distincta corpuscula, tam tenui textu prædita, vel tam subtili filo deducta, ut solidissimas quasque partes penetrando subeant, calorem delatura. Vnus ad eam rem satis est domi, & apud nos primò natus sanguis, vitæ lar, fons, & conservator, summi rerum opificis quasi vicarius, extorum ac totius corporis, ævi longioris, somni, vigiliarum, ingenij, sapientiæ, animi permotionum autor, calorisque germana sedes ac vehiculum: ejus quippe accessio, & abcessio calorem adducit, & abducit. Quomodo stolidâ gravisque terra frigore contracta torperet, nisi deorsum è volubilis ac in orbem incitatus cœli culmine in eam se calor demitteret: sic immota rigerent membra, nisi sanguis, solis instar, ipsis suapte vi calorem infunderet. Ejus præsentia collustrata calent, florent, vigent, splendent; eo vel è corde, pulmone, jecore, liene, renibus-ve expresso, pallent. Planè sanguis cum animâ, aut si mavis, anima cum sanguine nihil non perficit in corpore, minimoque momento in hanc illam-ve partem impellitur, ut unâ eademque viâ sanguisque animusque sequantur: nec magis ab illo divelli queat calor, quàm vita. Propterea in viventibus nullibi non reperitur, utque non pauca animantes vitam tolant defectæ corde, pulmone, aut aliorum viscerum mole: in vitâ tantisper manere nulla potest absque sanguine, ei-ve cognato humore caloris particeps, quo tanquam vitali succo continenter irrigetur.

**S**ANGVIS extra venas calor inops, truo est, resignava, suis in vasis, admirabilis. Dant hæc ipsi aditus ad quosvis partium recessus, vel ipso jam albescente referti nervi, à cerebro sicut venæ & arteriæ à corde, tracti vel profecti in omne corpus ducuntur, quos si pupugeri, tam copiosus, tam liquidus effluet, ut non facilè sistas. Perperam igitur illic quæras qui curret, qui toties in viam se dent, redeantque spiritus, puritate, splendore, illuminandi potestate nitentes: perperam & in cerebri se cum arteriis stringentis laxantique medulla, aut cavernis, per quas tantum uberrimi quod ab illis hausit alimentis purgamenta defluunt. Vt ad mentem quæ in ejus arce habitat, velut in cœlo Deus, sensus ex omni parte vix comprehensibili celeritate conveniant, nullus longo itinere descendit vagus spiritus. Haud fecus ac in sibus sonum qui una duntaxat in parte elicitur, totus refert remittitque bene contentus nervus, si relaxetur, aut aliquid interceptum sit, murus inersque fit: ita icibus nervi (qui cerebri propagines sunt, imò ipsum suis septum membranis cerebrum ad extremos artus productum) nisi quod illi vitium duxerint, eodem temporis momento fundit se continuata pulsio ad intima cerebri penetralia, in quibus sedens anima capit rerum omnium cognitionem, de illisque veluti de Sella ac tribunali pronunciat. Ne multa, stat firma partium conjunctio & in unum conspirans vigor, flagratque in membris, in quibus debet esse, vivus & quasi ardens sensus, quamdiu relinquatur illis liberum cum sanguine & calore commercium.

*Ergo ab uno sanguinis calore vita munia.*

DOMINI DOCTORES DISPVATVRI.

M. Carolus de Laval.  
M. Dionysius Dodart.  
M. Dionysius Puyton.

M. Ioannes Baptista de Revelois.  
M. Fabianus Perreau.  
M. Edmundus Charrier.

M. Nicolaus Matthieu.  
M. Iacobus Renaut.  
M. Nicolaus Langlois.

Proponēbat Lutetiæ IOANNES ROBERT Parisinus, A. R. S. H. M. DC. LXIX.